

## Piki bo bulchi

---

**Tin biaha ta nesesario pa un komisario òf supervisor entregá su retiro. Mi no ta papia akí tokante kasonan di malkondukta òf ku su posishon bira intolerabel. E ora ei, bon mirá, no ta trata di tuma retiro sino mas bien di kita un hende òf fòrs'é pa kita. Mas difisil i interesante ta e kaso kaminda e komisario mes ta sinti ku ta mihó pa e mes piki su bulchi.**

Imaginá bo ku bo ta miembro di un hunta di komisario. Esaki ta tuma un desishon ku bo no ta di akuerdo kuné ètòl. Bo mester piki bo bulchi e ora ei? En prinsipio nò. E kolektivitat di e hunta di komisario ta responsabel i abo tin solamente un bos den esaki. Ke men bo opinion lo por kai chikí. Si bo no por ku esaki, e ora ei bo no ta adekuá komo komisario. Pues guli manda abou i sigui pa dilanti. Esaki ta bira mas fèrfelu na momentu ku e desishon en kestion ta di un karakter mas di prinsipio. Por yega un momentu ku abo komo individuo lo no ke karga responsabilidad pa resultado di e tumamentu di desishon ei. E momentu ei no mester keda determiná pa sintimentu òf emoshon. Loke ta desisivo ta ku si e desishon e kestion, segun kriterionan ophetivo rasonabel, ta bai dje tantu kontra interes di e empresa ku konsekuensianan di esaki por tin un impakto negativo serio riba kontinuidat di e operashon empresarial. E ora ei numa a yega e momentu pa bo saka bo mes komo individuo for di e kolektivitat. Promé ku esei nò. T'asina ku a nombrabo komo komisario, hustamente pa bo ta un bui di tranquilidad i sabiduria den tempu turbulento tambe. Bandoná e barku den un stadio trempan no ta pas den esaki. No lubidá tampoko ku e responsabilidad di komisarionan ta algu kolektivo. Retiro komo komisario no ta librabo di e responsabilidad ei, sigur no pa loke ta trata e periodo ku bo tabata den funshon. Pió ainda, tuma retiro por te asta krea responsabilidad den un situashon di krisis. Serka algun NV di gobièrnu, sa sosodé ku e (representante di e) akshonista ta keda sin yena e vakaturanan na tempu. Riba nos islanan, por papia tin biaha di un situashon kaminda solamente ún komisario ta den funshon. Esaki indudablemente lo sinti su mes so i inkómodo. E no por piki su bulchi. E ta supos di hasi su máximo esfuerso pa sòru pa komisarionan bin aserka pa asina refsorsá e tim.

Imaginá bo ku pikiment'i bulchi ta realmente algu aktual, kon bo tin ku atendé ku esaki? Komo komisario bo tin e obligashon pa regla bo baimentu na un manera ku ta kuadra ku un komisario su responsabilidad. E empresa no tin mag di sufri daño dor di esaki, ni tampoko ora bo tin sintimentunan profundo di malkontentu komo komisario ku ta bai. Por evitá daño di reputashon dor di mantené e diferencia di opinion den seno privá. Loke tambe meresé di haña prioridat ta di averiguá si por posponé e pikiment'i bulchi te final di e periodo di legislashon òf te e momentu ku haña un sucesor.

Sa sosodé ku un hunta di komisario den su totalidat tin un diferencia di opinion fundamental i aparentemente insolushonabel ku gerensia. Esaki por resultá den tur sorto di situashon brutu i generalmente desbentahoso pa e empresa, manera por ehèmpel un skòrsmentu di e miembronan di gerensia. Pa definishon mi ta haña ku e responsabilidad primario pa yega na un solushon den tipo di situashonnan asina ta sinta serka e hunta di komisario. Esaki ta responsabel pa evitá un eskalashon innesesario. Esaki ta nifiká ku, na tempu, mester buska métodonan suave pa solushon di konflikto, por ehèmpel mediation. Piki bo bulchi di forma kolektivo komo hunta di komisario kasi nunca no ta un bon solushon.

E ora ei bo ta bula pipa kompletamente pa bo responsabilidad. Ta realmente un diploma públiko di inkapasidat. I bo no ta logra nada si bo piki bo bulchi pasó gerensia ta sigui dal bai manera nada no a pasa.

---



[Frank Kunneman](#)

VanEps Kunneman VanDoorne  
Attorney at law | Partner

T +5999 461 3400 ext. 254

E [kunneman@vandoorne.com](mailto:kunneman@vandoorne.com)

---